

700 sukarelawan memperingati tragedi pesawat MH370

Seramai 700 sukarelawan Institut Onn Jaafar (IOJ) berhimpun di Kampus Universiti Taylor's di sini, semalam, sempena memperingati hari tragedi pesawat MH370 yang genap setahun esok.

Naib Canselor Universiti Taylor's, Prof Datuk Dr Hassan Said berkata, matlamat utama program #MH370 'Forever In Our Hearts' itu diadakan untuk sama-sama berdoa dan berharap keluarga semua 239 penumpang dan anak kapal pesawat malang itu sentiasa diberi kekuatan untuk meniti kehidupan mereka.

"Meskipun majlis ini serba ringkas tetapi ia menunjukkan tanda ingatan kita terhadap tragedi menyedihkan itu dan diharapkan ahli keluarga mangsa sentiasa tabah dan kuatkan semangat," katanya ketika ditemui.

Kebanyakan sukarelawan terbabit adalah penuntut Universiti Taylor's dan turut disertai sukarelawan IOJ dari Universiti Malaya (UM), Universiti Kebangsaan Malaysia (UKM), Universiti Teknologi Mara (UiTM) dan Universiti Putra Malaysia (UPM).

Sebanyak 239 belon dilepaskan sebagai tanda memperingati mangsa MH370.